

## 每週經課朗誦經文(巴克禮漢羅/教羅)2013/01/20

### 共同經課 - 1 以賽亞書六十二章一節~五節

1 我因為錫安 ê 緣故的確無靜靜，因為耶路撒冷 ê 緣故的確無歇暍，直到伊 ê 公義親像光 teh 發出，伊 ê 拯救親像燈 teh tóh。2 列國 beh 看你 ê 公義，列王 beh 看你 ê 榮光；你 beh 得 tiòh 稱呼新 ê 名，就是耶和華親嘴所稱呼 ê。3 你 beh tī 耶和華 ê 手中做 súi ê 王帽，tī 你 ê 上帝 ê 手掌做冕旒。4 你無 koh 稱做受棄 sak-ê，你 ê 地也無 koh 稱做拋荒 ê；你 beh 稱做我所歡喜 ê，你 ê 地也 beh 稱做有丈夫 ê；因為耶和華歡喜你，你 ê 地也 beh 做有丈夫 ê。5 因為親像少年人娶在室女，你 ê 百姓也 beh án-ni 娶你；親像新 kiá<sup>n</sup> 婿歡喜新娘，你 ê 上帝也 beh án-ni 歡喜你。

### 共同經課 - 2 詩篇三十六篇五節~十節

5 耶和華 ah，你 ê 慈愛是 tī 天裡；你 ê 信實到 tī 穹蒼。6 你 ê 義親像極高 ê 山；你 ê 判斷是親像深淵。耶和華 ah，人 kap cheng-si<sup>n</sup>，你 lóng 保護 in。7 上帝 ah，你 ê 慈愛怎樣 hiah 寶貝 ah！世間人 bih tī 你翼股 ê 致蔭下。8 In beh 因為你 ê 厝 ê 好物，得 tiòh 飽足；你亦 beh hō in lim 你快樂 ê 河水。9 因為活命 ê 源頭，在 tī 你 hia；Tī 你 ê 光，阮 beh 看見光。10 願你常常施慈愛 hō bat 你 ê 人；常常用你 ê 公義施 hō 心內正直 ê 人。

### 共同經課 - 3 哥林多前書十二章一節~十一節

1 兄弟 ah，論到神 ê 賞賜，我 m̄ ài lín m̄ 知。2 lín 知 lín 做外邦人 ê 時，受迷惑去就近 boē 講話 ê 偶像，chhut-chhài 伊引誘。3 所以我 hō lín 知，hō 上帝 ê 神感動來講 ê，無人講，耶穌是 thang 咒詛；若 m̄ 是 hō 聖神感動 ê，也無人會講，耶穌是主。4 Ta<sup>n</sup> 恩賜有分別，但是神是 siāng 一個。5 職份有分別，但是主是 siāng 一個。6 功用有分別，但是上帝 siāng 一個，施行萬事 tī 眾人中 ê。7 但是聖神 ê 顯明是賞賜 tak 人 beh 利益眾人。8 因為有 ê tùi 神用智慧 ê 話 hō 伊；有 ê 照 chit-ê 神用知識 ê 話 hō 伊；9 koh 有人 tī chit-ê 神用信 hō 伊；有 ê tī chit-ê 神用醫病 ê 恩賜 hō 伊；10 有 ê hō 伊能行各樣 ê 權能；有 ê hō 伊做先知；有 ê hō 伊能分別 chiah-ê 神；koh 有 ê hō 伊能講 tak 樣 ê 音語；有 ê hō 伊能翻譯 tak 樣 ê 音語。11 Chiah-ê lóng 是 siāng 一個神所施行 ê，照伊所 ài ê，隨樣分 hō tak 人。

### 共同經課 - 4 約翰福音第二章一節~十一節

1 第三日 tī 加利利 ê Ka-ná 有婚姻 ê 筵席；耶穌 ê 老母 tī hia；2 耶穌 kap 伊 ê 學生也 hō in 請去赴筵席。3 酒用了，耶穌 ê 老母就對伊講，In 無酒 lah。4 耶穌 kā 伊講，老母 ah，我 kap 你甚麼干涉？我 ê 時 iáu-bē 到。5 伊 ê 老母 kā chiah-ê 差用 ê 人講，凡若伊 kā lín 講 ê，lín tiòh 行伊。6 照猶太人洗清氣 ê 例，tī hia 有排六個石甕，tak-ê 能 toé 得兩三桶水。7 耶穌 kā 差用 ê 人講，用水 hō 伊滿甕。就 hō 伊滿到甕口。8 Koh kā in 講，Ta<sup>n</sup> tiòh iú<sup>n</sup> 伊，捧 hō 掌理筵桌 ê 人。就捧 hō 伊。9 水變做酒，掌理筵桌 ê 試 lim 伊，m̄ 知 tùi tá-lòh 來，(獨獨 iú<sup>n</sup> 水 ê 差用知)；掌理筵桌 ê 就叫新 kiá<sup>n</sup> 婿來，10 kā 伊講，人 lóng 是事先排好酒；到人 lim choē-choē，chiah 用 khah 次 ê；獨獨你留好酒到 chit-tiáp。11 Chit-ê 頭一 pái ê 神蹟，耶穌行 tī 加利利 ê Ka-ná，來顯出伊 ê 榮光；伊 ê 學生就信伊。